

दिनांक : 19.01.2026

समय : 18.45 बजे

- कृषि अर किसान कल्याण मंत्री शिवराज सिंह चौहान कांग्रेस माथे विकसित भारत जी राम जी कानून रा बारा मांय जनता ने गुमराह करण रो आरोप मांड्यो
- भारतीय जनता पार्टी रा राष्ट्रीय अध्यक्ष ओहदा सारु कार्यकारी अध्यक्ष नितिन नबीन नामपानो दाखिल कीनों
- लोकसभा अध्यक्ष ओम बिरला कह्यो-लोकतांत्रिक संस्थावां री मर्यादा अर सदन री गरिमा बणायी राखणो सगळा विधानसभा अध्यक्षं री जिम्मेदारीं
- प्रदेश मांय आज केई ठोड़ां मौसम रो मिजाज बदल्यो

000

कृषि अर किसान कल्याण मंत्री शिवराज सिंह चौहान कांग्रेस माथे विकसित भारत जी राम जी कानून रा बारा मांय जनता ने गुमराह करण रो आरोप मांड्यो हैं वे आज नई दिल्ली मांय राख्यी ज्या एक कार्यक्रम मांय बोल रह्या हां श्री चौहान कह्यो के मनरेगा रा तैत दिया ज्या हक केवल कागजां मांय रह्यां कृषि मंत्री कांग्रेस माथे विचार, विचारधारा अर आदर्शां ने छोड़ देवण रो आरोप मांडता थकां कह्यो के देश रा विकास अर गरीबां री भलाई ऊं कांग्रेस रो कोई लेनो-देणो नी हैं केंद्रीय मंत्री कह्यो के देश री हर ग्राम पंचायत वी.बी. जी राम जी कानून रा दायरा मांय आवेलां

000

भारतीय जनता पार्टी रा राष्ट्रीय अध्यक्ष ओहदा सारु चुनाव बाबत् आज पार्टी रा कार्यकारी अध्यक्ष नितिन नबीन नामपानो दाखिल कीनों ई दौरान रक्षा मंत्री राजनाथ सिंह, गृह मंत्री अमित शाह, मुख्यमंत्री भजनलाल शर्मा, राज्य री पैली वाळी मुख्यमंत्री वसुंधरा राजे अर कुछ और राज्यां रा मुख्यमंत्री ई मौजूद हां राष्ट्रीय अध्यक्ष रो चुनाव पार्टी री राष्ट्रीय परिषद् अर राज्य परिषदां रा नुमाइन्दां ऊं बण्या समूह री ओर ऊं कर्यो जावे हैं मौजूदा दौर मांय ओ ओहदो केंद्रीय मंत्री जगत प्रकाश नड्डा कने हैं श्री नड्डा ने जून 2019 मांय भाजपा रा राष्ट्रीय कार्यकारी अध्यक्ष रा तौर ऊं नियुक्त करी ज्या हा बर बाद मांय वां ने जनवरी 2020 मांय निर्विरोध पार्टी रा अध्यक्ष चुणी ज्या हां

00000

अंतर्राष्ट्रीय मुद्रा कोष-आईएमएफ भारत री माली बरकत री रेट रो अनुमान शून्य दशमलव सात अंक बधा र सात दशमलव तीन फीसदी कर दीनो हैं विश्व आर्थिक आउटलुक अपडेट मांय आईएमएफ बतायो के आ बधोतरी ई माली साल री चौथी तिमाही मांय मजबूत रफ्तार ने बतावे हैं आईएमएफ माली साल 2026-27 सारु भारत री माली बरकत री रेट छह दशमलव चार फीसदी रो अंदाजो लगायो हैं

0000

देश मांय एमएसएमई हलका रा 3 लाख ऊं बत्ता कारोबारियां ने सरकारी बैंक 52 हजार 300 करोड़ रुप्या ऊं बत्ता कर्ज मंजूर कीना हैं वित्त मंत्रालय रे मुजब अ कर्ज ई माली साल मांय दिसम्बर महीना ताई मंजूर करी ज्या हैं सरकारी बैंक एमएसएमई सारु डिजिटल फुटप्रिंट माथे आधारित क्रेडिट असेसमेंट मॉडल सरु कीनो है, जिण ऊं कर्ज रा मूल्यांकन मांय तेजी आवे हैं

0000

राजस्थान अनुसूचित जाति, जनजाति वित्त अर विकास निगम ई माली साल मांय 20 करोड़ रुप्या रा कर्ज मंजूर करी ज्या हैं ई रा तैत अनुसूचित जाति, जनजाति, सफाई कर्मचारियां अर दिव्यांगजन समेत 1 हजार 381 जणां ने सस्ता कर्ज मुहैया करायी ज्यां इण रा तैत जिला स्तर री समितियां कानी ऊं ई महीना ई इन्टरव्यू कर्या जावेला, ज्यीं पाछे कर्ज री रकम संबंधित लोगां रा खातां मांय भेजी जावेलां ई सागे ई प्रधानमंत्री अनुसूचित जाति अभ्युदय योजना रा पात्र लोगां ने 50 हजार रुप्या ताई री सब्सिडी ई दी जा रही हैं

000

प्रदेश रा न्यारा-न्यारा शहरां मांय स्टार्टअप सरु व्हेवण ऊं नौजवानां सारु नौकरी-धंधा रा मौका बध रह्या हैं राज्य सरकार कानी ऊं नौकरी-धंधा ने बधावो देवण वाळी नीतियां रे कारण अ शहर अब

नुवा कारोबारी केन्द्र रा तौर ऊं सामी आ रह्यो हैं म्हाणा जोधपुर खबरनवीस बतायो के नौजवानां मांय नवाचार अर खुद रा काम—धंधा रा प्रति बधता रुझान ऊं माली हलचल मांय बधोतरी व्हे रही हैं

000

86वाँ अखिल भारतीय पीठासीन अधिकारी सम्मेलन आज उत्तरप्रदेश री राजधानी लखनऊ मांय सरू व्ह्यो सम्मेलन मांय लोकसभा अध्यक्ष ओम बिरला कह्यो के लोकतांत्रिक संस्थावां री मर्यादा अर सदन रो मान बणायो राखणो सगळा विधानसभा अध्यक्षों री भेळी जिम्मेदारी हैं श्री बिरला कह्यो के साल 2015 मांय व्ह्या सम्मेलन पाछे देश रा करीब करीब सब विधानमंडल डिजिटल बण गया है अर सदन री कार्यवाही रो सीधो प्रसारण कर्यो जा रह्यो हैं वे ज़ोर दे र कह्यो के जनता रा नुमाइंदां कानी ऊं सदन मांय उठायी ज्या मुद्दा सरकार तांई पूगणा चाहिजे अर वां रा सकारात्मक नतीजा मिलणा चाहिजे

0000

भारतीय सेना रा 78वां स्थापना दिवस रा सिलसिला मांय चाल रह्या कार्यक्रमों रा तैत आज जयपुर मांय खास मान जळसो राख्यी ज्यो इण मांय सप्त शक्ति कमान रा कमांडर लेफ्टिनेंट जनरल मनजिंदर सिंह बेहतरीन काम करण वाळा फौजियां, अहलकारां अर जनता रो मान कीनों ई मौके वे फौज अर जनता बीचे बधता तालमेल री सराहवणा कीनीं ध्यानजोग है के ई साल फौज वां रो स्थापना दिवस जनता बीचे मना रही हैं

000

प्रदेश मांय आज केई ठौड़ां मौसम रो मिजाज औचक ई बदल ग्यो राजधानी जयपुर समेत केई हलकां मांय घणा बादळा मंड ग्यां मौसम केंद्र जयपुर रे मुजब राज्य मांय 22 ऊं 24 जनवरी बीचे जोधपुर, बीकानेर अर शेखावाटी हलकां मांय मावठ रा आसार हैं महकमो ई दौरान जयपुर अर भरतपुर संभाग मांय बिरखा रा आसार जताया हैं मौसम विभाग रे मुजब आवता दो—तीन दिन तांई पारो थोड़ो चढेला, पण 22 जनवरी पाछे पारो ओजू उतरेलां प्रदेश रा कुछ हलकां मांय धुंअर रेहवण री ई संभावना हैं

0000

सवाईमाधोपुर रा स्थापना दिवस रा सिलसिला मांय चाल रह्या अमरूद महोत्सव अर कृषि तकनीक मेळा मांय फलां ऊं बणायी ज्यी न्यारी—न्यारी चीजां रो दरसाव करी ज्यो हैं पंजाब मांय अबोहर रा सेंट्रल इंस्टीट्यूट ऑफ पोस्ट—हार्वेस्ट इंजीनियरिंग एंड टेक्नोलॉजी रा वैज्ञानिक डॉ. रमेश कुमार बतायो के फलां ऊं न्यारी—न्यारी चीजां बणा र वां ने लंबा बगत तांई हेर र राख्या जा सके है, जिण ऊं किसानां ने बत्ते फ़ायदो मिले हैं

सवाईमाधोपुर रा शहीद कैप्टन रिपुदमन सिंह राजकीय स्नातकोत्तर महाविद्यालय री विद्यार्थी दीपिका शेखावत कह्यो के अमरूद महोत्सव अर कृषि तकनीक मेळा मांय वां री जाणकारी बधी हैं

000

बालोतरा ज़िला मांय खिलाड़ियां सारू नुवो स्टेडियम बणायो जा रह्यो हैं ज़िला कलेक्टर सुशील कुमार यादव बतायो के ई स्टेडियम ऊं वठे रा खिलाड़ियां ने बूतो बधावण रो मौको मिलेलां

.....

वठे रा विधायक अरुण चौधरी बतायो के नुवो स्टेडियम बणबा ऊं गांवाई हलका रा नौजवानां मांय खेलां ओड़ी रुझान बधेलां

000

प्रदेश मांय वंचित तबका री जनता तांई सरकारी योजनावां रो फायदो पूगावण सारू आज खास शिविर लगायी ज्यो पाली मांय घुमंतु समुदाय रा लोगां ने सरकारी योजनावां रो फायदो दिरावण रा मकसद ऊं घुमंतु समुदाय रा पिरवारां सारू खास शिविर लगायी ज्यो शिविर रा प्रभारी प्रवीण सिंह राजपुरोहित बतायो के इण मांय ई समुदाय रा लोगां रा मतदाता पहचान पत्र, आधार कार्ड, जाति प्रमाण पत्र अर मूल निवास सरीखा ज़रूरी कागज़ात मौके ई बणायी ज्यो

000

जयपुर ज़िला री न्यारी—न्यारी सरकारी अर गैर—सरकारी स्कूलां मांय 22 जनवरी ने 'पंच—गौरव' चित्रकला होड़ राख्यी जावेलां ज़िला कलेक्टर डॉ. जितेन्द्र कुमार सोनी बतायो के ई होड़ रो मुद्दो 'एक जिला—एक पहचान' राख्यी ज्यो हैं ई रा तैत विद्यार्थी आमेर रा किला, कबड्डी, गहणा अर स्थानीय सामान ऊं जुड्या चित्रबणावेलां आ होड़ पंचायत, ब्लॉक अर ज़िला स्तर माथे राख्यी जावेलां जिला स्तर माथे बेहतरीन चित्र बणावण वाळा विद्यार्थियां ने सर्टिफिकेट दे र नवाजा जावेलां

रेलवे जोधपुर-रामदेवरा बीचे काल ऊं खास रेल चलावेलां 28 जनवरी तांई रोजीना चालण वाळी आ गाडी जोधपुर ऊं संवारे साढे नौ बज्यां रवाना व्हे र दोपहरां पाछे एक बज्यां रामदेवरा पूगेलां पाछी रामदेवरा ऊं दोपहरां पाछे 2 बज्या चाल र सिंज्या साढे 5 बज्यां भगत की कोठी टेसन पूगेलां गेला मांय आ गाडी राईकाबाग, मंडोर, ओसियां अर फलौदी समेत खास टेसनां माथे रूकेलां

0000

नई दिल्ली मांय 21 जनवरी ऊं भारत अंतरराष्ट्रीय लोकतंत्र और निर्वाचन प्रबंधन सम्मेलन व्हेलां निर्वाचन आयोग री मेजबानी मांय व्हेवण वाळा तीन दिन रो ओ सम्मेलन लोकतंत्र अर निर्वाचन प्रबंधन रा हलका मांय भारत री ओर ऊं राख्यो जावण वाळो सब ऊं मोटो वैश्विक सम्मेलन व्हेलां इण मांय दुनिया रा 70 ऊं बत्ता देशां रा कोई 100 नुमाइंदां रे शामिल व्हेवण री संभावना हैं

000